

## Hoesbrandjes

- Cees: Moi, inspecteur.
- Inspecteur: Ook goiendag, eh .....Kees, wast nait?
- Cees: Klopt, mor den wel groag mit n C aan t begun.
- Inspecteur: Ik maark wel dast doe n man van de letter bist, mor ik vin t aal goud, mien jong.
- Cees: Ik heb al n zetje niks van joe heurd. Ook bie pad en weg binnen je de leste tied reedlek onzichtbaar. Hou komt dat aiglieks.
- Inspecteur: ? Dat vaalt dus op, dat ik al n zetje oet t stroatbeeld verdwenen bin?
- Cees: Echt wel, dus doaram docht ik, ik mout mor es even kieken of der niks biezunders loos is mit onze veldwachter.
- Inspecteur: Niks biezunders, niks biezunders, dat is meschain te veul zegd, mor ... joa, man, der is dus wel degelieks wat gebeurd de leste tied.
- Cees: Kinnen je der over proaten?
- Inspecteur: ..... mit muite
- Cees: Ik heur joe nait zo goud. Woaram proaten ie inains zo zachies.
- Inspecteur: Omdat de woorden mie hoast nait tot haalsgat oet willen.
- Cees: Inspecteur!! Wat is joe wel overkommen, dat ie der nait over proaten kinnen....nou ik joe goud bekiek in t licht van d'schemerlaampe, vaalt mie op, dat ie aan d'ziedkaante van t gezichte ja hailemoal bont en blaauw binnen. Hou is dat wel zo kommen.
- Inspecteur: Deur n klaain hoesbrandje.
- Cees: Bedoulen ie, dat ter aine mit vuur speuld het?
- Inspecteur: Joa, dat docht ik ook, dou mien sikketoaresse mie t braifke op t bero hìnlegde. Ze haren heur bèld mit d'mitdailen dat ter op nummer vieftien van d'Kloosterloane hait aan tou ging.
- Cees: Ze..???
- Inspecteur: De burenen.
- Cees: Den haren de burenen toch beter de brandweer bèllen kind.
- Inspecteur: Begunst al weer zo te drammen. Liekst mien sikketoaresse wel. Dij het mie dij dag ook al zo opjagd:
- 'Ie mouten der votdoadelk op òf inspecteur, aans valen der nog dooien.'
- Cees: Dus ie der op fietse hìn.
- Inspecteur: Joa, zo haard heb ik nog nooit reden, dunkt mie.
- Cees: En wat zagen ie doar op d'Kloosterloane nummer vieftien.
- Inspecteur: Van alles, mor gain rook en ook gain vuur.
- Cees: t Was dus gain hoesbrandje.
- Inspecteur: t Was grote, n meroakels grote hoesbrand.
- Cees: Houzo?
- Inspecteur: Dou'k de fietse toenpad oree, waren ze net bezeg de stoulen noar boeten te gooien.
- Cees: Haren dij mìnsen gain kinder?
- Inspecteur: Wat het dat ter nou weer mit te moaken?
- Cees: Dat liekt mie logies. As der in hoes brand is, den zörgst eerst dast de levende hoave, in elk geval d'kinder boetendeure krigst.
- Inspecteur: Mor der was ja gain brand.
- Cees: Woaram gooiden ze den aal t meubilair noar boeten tou.
- Inspecteur: Omdat ze mekoar mit stoulen en van alles wat lös en vast zat in hoes noar de kop tou smeten.
- Cees: Oooooohh!
- Inspecteur: Wat oooooohh.
- Cees: Der was dus gain brand, der was ....
- Inspecteur: Roezie, dikke roezie.
- Cees: Tussen ...?

Inspecteur: Dat kon ik aan d'boetenkaante ja nait zain.  
Cees: En wat hebben ie dou doan?  
Inspecteur: Ahum.. wat ik aaltied dou. Ik klop aan deure en ik roup: In noam der wet, inspecteur Panjer Pinkster is der.  
Cees: En dou wui t zeker stil.  
Inspecteur: Joa, dat haar ik ook docht, mor dat vuil tegen, want in hoes ging t gerinkel en group en gereer gewoon deur.  
Cees: En dou dochten ie ...  
Inspecteur: Ik wol dat ik mien karabijn bie mie haar.  
Cees: Wollen ie den goan schaaiten?  
Inspecteur: Nee, natuurlek nait, mor as n soort van òfschrikken.  
Cees: Mor ...  
Inspecteur: Omdat dij verduvelde sikketoaresse mie deure oetjagd het om zo snel meuglek op de plek van t onhail te kommen, heb ik mien woapenmatterioal dus vergeten. Ik ston mit net niks in d'haand doar n beetje deur n roete hin te koekeloeren, dou t gebeurde.....  
Cees: Woarom vertellen ie nait verder, dou wat gebeurde ...  
Inspecteur: .. dat de televizie deur t roam naar boeten kwam.  
Cees: Dat hebben ie zain?  
Inspecteur: Nee, dat heb ik vould. Zain heb ik niks meer van òf dat mement, want ik bin doar veur t hoes tegen de vlakke goan ....  
Cees: Je hebben hom dus liek veur de kop had.  
Inspecteur: Dat kist wel zo nuimen.  
Cees: En hou ist verder òflopen.  
Inspecteur: Joa, dou was de roezie òflopen.  
Cees: Dat ie dat aal zo persies nog waiten.  
Inspecteur: Van heuren zeggen, mien jong. Van heuren zeggen.  
Cees: Der binnen dus gounent dij t zain hebben.  
Inspecteur: De bureen.  
Cees: Dezulfdn?  
Inspecteur: Dij hebben, verscholen achter d'hege, de film van heur leven zain. Ze vertellen overal in geuren en kleuren in t dörp in t rond, wat zok op nummer vieftien òfspeuld het.  
Cees: Da's mie nogal n verhaal, nait. En hebben ie t aal n beetje verwaarkt.  
Inspecteur: Ach, wat zol'k zeggen. Staaist ter bie d'lu in t dörp noa zo'n gebeurtenis natuurlek wel reedlek gekleurd op. Mor goud, dat gekleurde paast wel bie het bonte veurkommen van mien gezichte. t Lopen gaat ook nog wat stoer, mor dat is hopelk in n dag of wat over.  
Cees: En den kinnen ie weer gewoon aan t waark.  
Inspecteur: Dat zel wel mouten, hè.  
Cees: Joa, t leven is ain groot leerperses mouten je mor reken.  
Inspecteur: Dat zegst doe goud, Cees. Der wordt ons van hogherhaand aaltied veurhouden, dat we alles in t waark stellen mouten om gain agressie bie d'minsen op te roupen, mor n volgende keer neem ik, bie grote en klaaine hoesbrandjes, echt mien karabijn mit. Loaden en wel.